

La California cunter Trump

Da la colonia europeica al stadi american

DA GUIU SOBIELA-CAANITZ

■ **Tgi vegn elegi president dals USA il november 2020? Bliers experts da politica americana manegian che Donald John Trump, naschì ils 14 da zercladur 1946, saja lura memia vegl per vegnir puspè en dumonda.** Quai na constetia betg, manegia Alain Campiotti en «Le Temps» dals 17 da december. Lez è persuas che Trump lavuria gia per vegnir reelegi il 2020. Ma ina resistenza datti. La gasetta online «The Independent» (Londra) è cumparada ils 6 d'october 2017 cun la lingua grossa: «California becomes 'sanctuary state' [stadi d'asil] with law protecting immigrants from Trump.» La California (passa 37 milliuns olmas) è l'emprim stadi dals USA areguard la cifra da populaziun. Sut lezza lingua grossa stat in purtret da Jerry Brown, guvernatur dal stadi dapi 2011. L'emprima frasa dal text di che Brown «has signed a bill [ina lescha] sharply limiting the state's cooperation with federal immigration authorities, continuing the liberal campaign to defy Donald Trump's immigration hardline.» La gasetta citescha in commentar scrit da Brown: «Lezza lescha duai surlevgiar quellas famiglias che vivan mintga di en la tema.» La California vul dapli immigraziun; ses dretg cuntralescha expressamain als decret federal da Trump en chausa.

En il mund da lingua spagnola

La California (410795 km², chapitala Sacramento) è il terz pli grond stadi dals USA. Ella ha ina riva da mar da var 1200 miglias sper il Pacific e cunfinescha cun auters trais stadis dals USA: L'Arizona, la Nevada e l'Oregon, respectivamain 6931071, 2940058 e 4093465 olmas. Il Piz Whitney en la Sierra Nevada, punct culminant da la California, è 4418 m aut, dapli che noss Piz Bernina (4049 m). Ils nums da Sacramento e da la Sierra Nevada dattan perditga da la profunda tempr spagnola dapi la colonisaziun en il 18avel tschientaner e l'immigraziun dapi il 19avel. Il 2016 devi en California 10672610 umans da lingua spagnola. Era Chinois immigreschon sur il Pacific en California dapi il 19avel tschientaner; il 2016 devi 1231425 personas da lingua chinesa. Las emprimas populaziuns umanas en l'America dal nordvest èn arrivadas da l'Asia dal nordost (oz district dals Tschutschkis en Russia) avant ca. 16500 onns. Las perditgas umanas las pli anticas (avant 13000 onns) en l'actuala California

han ins chattà sin l'insla da Santa Rosa a vest da Los Angeles. Ils Spagnols han colonisà il México davent dal 16avel tschientaner e la California limitrofa davent da 1697; il 1821 hani cuntanschi il cunfin nord dal pajais. Ma gist 1821 èn ils signurs spagnols dal México sa proclamads independents. Il militar e politicher Iturbide (1783–1824) è vegnì 1822 «imperatur Augustin» e lura executà. Sin quai ha ina assemblea constituenta proclamà la republica federala.

Integraziun en ils USA

Davent da 1830 èn colonists dals USA limitrofs vegnids a star en California. James Knox Polk (1795–1849, dal stadi cun sclavaria Carolina dal nord), president dals USA davent da 1845, leva annectar quella part da Mexico ed ha cuntanschi lezza finamira cun l'approvaziun d'ina part dal public. Il 1845 ha il politicher e schurnalist James L. O'Sullivan (1814–1895) punctuà «our manifest destiny to overspread the continent allotted by Providence» («noss destin evident d'ans extender sin il continent che Dieu ans ha assegnà» (1). Umans sco plevon Theodore Parker (1820–1860) condemnavan la guerra, ma spretschavan ils Mexicans, «in pievel disgustus [wretched] areguard l'origin, l'istorgia ed il character» (2). En California han colonists immigrads dals USA «fatg in'atgna guerra, assagli abitadis spagnols, engulà chavals e declerà la California separada dal México» (3). Il manual (v. nota 1) da l'istoricher Howard Zinn (1922–2010, Universitad da Boston) rapporta da bleras atrocitads commessas da schuldads dals USA. La pasch da Guadalupe Hidalgo (1848) ha surlaschà als USA la California ed autras parts dal México, en total 1370143 km². La scuverta d'aur en California ha stimulà l'immigraziun; gia 1850 è il territori vegnì il 31avel stadi dals USA. 1869 han ins avert ina viafier che colliava la rait da California cun quella dals stadis ad ost dal Missouri. «Sunter 1870 ha la 'Workingsmen's Party' (...) cunter l'immigraziun chinaisa gi in grond success en la politica locala (...). L'opposiziun a lezza immigraziun è restada ferma enfin a la promulgaziun da ses scumond. Sunter 1900 han mesiras cunter l'immigraziun giapunaisa stgaffi problems. Il 1906 ha la segregaziun da students giapunais a San Francisco manà a protestas da lur regenza (...). A l'entschatta dal 20avel tschientaner è la populaziun da la California creschida fitg» (4). L'immigraziun ve-

gnida per part da l'Europa centrala ha stgaffi il renum d'in quartier da Los Angeles numnà Hollywood («gnaud da fegliaspina»). La guerra dal Pacific cunter il Giapun (1941–1945) ha sviluppà ils ports e l'industria aviatica da la California.

Dus guvernatur ecologists

Il giurist Jerry Brown (*1938 a San Francisco) è stà guvernatur da California da 1975 a 1983 e puspè davent da 2010. «Il 1977 è el stà l'emprim politicher dal mund che ha concedì reducziuns da taglia a persunas ch'avevan muntà collecturs solars sin lur tetg. Il 1975 ha el cuntanschi l'aboliziun d'ina reducziun da taglia per las societads da petroli. El ha designà l'emprim Afro-american (...), l'emprima femna (...) e l'emprim Latinamerican (...) al tribunal suprem dal stadi (...). El ha impedì 1977 la reintroducziun da la paina da mort en California» (4). Da 2003 a 2010 era l'actur Arnold Schwarzenegger (*1947 en Austria) guvernatur dal stadi. «In element central da sia politica era il cumbat cunter il stgaudament dal clima (...). Il 2006 ha il stadi vuschà il 'Global Warming Solution Act' per limitar las emissiuns da gas cun effect da serra. Quai era l'emprima giada ch'in stadi dals USA agiva en lez senn (...). Guvernatur Schwarzenegger ha fatg plis viadis: A México 2006, Canada ed Europa 2007 euv. per metter ad ir collavuraziuns davart la reducziun da lez gas (...). El ha tschentà la California a la testa da la discussiun climatica en l'America dal nord cun stgaffir 2007 la 'Western Climate Initiative', program regiunal cun l'Arizona» (6), trais ulteriurs stadis e duas provinzas canadais limitrofas dals USA. Ma «The Great Recession» (7) e pliras midadas politicas en ils stadis pertutgads han manà 2011 a la fin da lez experiment. Guvernatur Brown, reelegi 2014, resista fermamain a president Trump areguard l'immigraziun ed il stgaudament climatic. Tgi succeda a Brown 2018 a Sacramento?

1. Cità da Howard Zinn, *A People's History of the United States*. New York (Perennial Classics, ISBN 0-06-052837-0) 2003, p. 151.
2. Cità da Howard Zinn (sco nota 1), p. 157.
3. Howard Zinn (sco nota 1) p. 163.
4. Grolier Incorporated (ed.), *The American Peoples Encyclopedia*, tom 4. New York, p. 136, chavazzin «California».
5. Wikipedia, Jerry Brown // Premier et deuxième mandat de gouverneur de Californie, p. 3.
6. Wikipedia, Histoire de la Californie, p. 22.
7. Lexology (ed.), *The Western Climate Initiative is dead, long live the WCI*, p. 2 (customerservices@lexology.com)